

OHR i federalni tužilac održali sastanak u vezi sa revizijom federalnog budžeta

Predstavnici OHR-a i federalnog tužilaštva održali su juče sastanak sa drugim nadležnim federalnim organima, i dogovorili naredne korake koji će se poduzeti u vezi sa posebnom revizijom vladinih računa koja je provedena u Federaciji i kantonima ranije ove godine i koja je otkrila 74 slučaja ozbiljne korupcije iz prošle godine.

Ovom sastanku su prisustvovali eksperti iz OHR-a, federalni tužilac, te predstavnici Federalnog ministarstva unutrašnjih poslova, Federalne finansijske policije, Federalne carinske uprave, Federalne poreske uprave, Federalne agencije za bankarstvo i Glavnog zavoda za reviziju Federacije.

Dogovoren je da će Federalno tužilaštvo, Finansijska policija Federacije i Ministarstvo unutrašnjih poslova Federacije tjesno koordinirati mjere koje će se poduzeti kako bi se osigurala uspješna istraga te krivično gonjenje ustanovljenih slučajeva korupcije.

Učesnici na ovom sastanku su takođe razmatrali metode rješavanja problema u vezi sa nedovoljnim nadzorom, nesposobnosti upravnih organa i sistemske korupcije.

Tromjesečnu reviziju federalnog i kantonalnih budžeta proveo je posebni revizor kojeg je imenovao visoki predstavnik u februaru ove godine, dok je sličnu reviziju budžeta Republike Srpske proveo tim sastavljen od predstavnika OSCE-a i Glavnog zavoda za reviziju Republike Srpske. Revizija računa Vlade RS

je otkrila 31 slučaj ozbiljne korupcije, o čemu će se razgovarati na sastanku zakazanom za 7. septembar ove godine.

Rezultati ovih revizija, koje je OHR i Misija OSCE-a u BiH objavila početkom jula, otkrili su široko rasprostranjenu netransparentnost, neučinkovitost i nemar, što je izazvalo ozbiljnu zabrinutost za stanje javnih finansija u BiH te za adekvatnost postojećih mehanizama kontrole trošenja novca poreskih obveznika. Revizije su naglasile hitnu potrebu reforme internih sistema kontrole te daljnju reviziju koju trebaju provesti relevantne domaće agencije.